

COLUMNA

Dal bainstar famiglier

VIOLA CADRUVI

S ch'insatgi dumonda co ch'i va cun mai, raquint jau co ch'i va cun mia figlia. Betg perquai ch'jau crai che quai interessescha plitost mes visavi u perquai ch'jau sun talmain inamurada en ella. Gliez forsa schon era in zic, ma atgnamain perquai che mes bainstar è talmain dependent da ses bainstar. Igl è da sa pender.

En general na fiss quai gea betg uschè nausch. Ins guarda simplamain ch'i giaja bain cun l'uffant e voilà. Ma nagut voilà. Cun in uffant è trasora insatge. In uffant pitschen ha en media circa diesch giadas l'onni in dafraid, natiers vegnan anc grippas digestivas ed ils suspects ordinaris, las malsognas d'uffants. Ergo pli ch'ina malsogna per mais! E quai n'èn lura betg dafruids sco tar ils creschids. Quels pon ir emnas. E las infezioni pon sa sviluppar en da tut il dianter. Bronchitis. Malcostas. Inflammaziuns da las ureglias...

L'ultim è perfin fitg savens il cas. Fin set giadas l'onni è normal! Set giadas! E mal las ureglias, quai è insatge ch'ins na giavischas gnanc a ses mender inimi. Ma per cletg datti gea la medischina. Quella è gea avanzada e po gidar als uffants. Hai jau pensà. Ma na! Fauss! Als uffants na dattan ins atgnamain per il



solit nagut ed anc ina giada nagut. Sin il pli globuli, è la devisa.

Cl'er, jau chapesch schon quai. In corp uschè pitschen che sto anc crescher na duess ins betg pumpar plain cun drogas tar mintga occasiun. E sch'i vegn lura propi serius, lura na fan ils medis betg lungas, quai hai jau era gia dastgà remartgar. Sche la pel dal schumber è curt avant schluppar, lura datti antibiotica, senza spargnar. Era quatter giadas entaifer dus mais, sch'i sto esser. Ma ussa sun jau ida ora per la roma.

Atgnamain lev jau gea discurre da mai, e betg da mia figlia e sias malsognas. Deplorablmain èsi dentant uschia che questas chaussas n'èn betg separablas. Sch'ella è malsauna èn ils dis pli stentus e las notgs pli lungas. Nus essan stanchels, per il solit era infeccats, plain quitads e nossa gnerva tendida. La corda

d'envidar è pli curta, il tun pli grit. Po esser che quai saja normal. Ma era sch'jau aveva avant mia maternidad gia udì che uffants èn adina malsaus, n'avess jau mai pensà che quai haja talas consequenzas sin il bainstar dals geniturs.

Jau na sun en general betg ina buna malsauna. Jau suffresch dad aut e plain cumpassiun cun mamma. Jau less lura il pli gugent murir (era sch'igl è mo in dafraid) e communitgesch quai era uschia. Forsa èsi pervi da quai ch'i ma mazz, sche la buoba è malsauna. Forsa hai jau era ina tendenza per surdramatizar. (Ualti segir hai jau ina tendenza per surdramatizar.) Ma sch'ins sa legra gia, sche la figlia è ina giada set dis senza avoir giu las lattiarnas, lura dastg'ins schon sa dumandar.

Matge ch'jau less atgnamain dir: I na va betg adina bain cun mai. Ed i giess forsa mintgatant meglier cun mai sch'jau n'avess nagin uffant. Ma sch'jau n'avess nagin uffant, lura stuess jau tut persula star bun per mes bainstar. E sch'jau sun sincera, ma para quai bler pli fadius che da pudair dar la culpa al dafraid da mia figlia.

Viola Cadruvi ha studegià germanistica, istorgia e rumantsch a l'Università da Turitg. Mintgatant lavura ella vi da sia dissertaziun e mintgatant sco scolasta, ma bunamain adina scriva ella.